

兩  
浙  
名  
賢  
錄

兩浙名賢錄卷十四目次

輔弼

明

東閣大學士吳濬仲沉

戶部尚書少保兼太子少傅夏惟詰原吉

少師金世忠忠

戶部尚書兼武英殿大學士黃崇豫淮

吏部尚書兼謹身殿大學士商弘載輅

翰林學士內閣呂逢原原

戶部尚書兼謹身殿大學士謝于喬遷

吏部尚書兼謹身殿大學士張茂恭孚敬

禮部尚書兼武英殿大學士呂汝立本

戶部尚書兼建極殿大學士袁懋中煒

禮部尚書兼文淵閣大學士高子象儀

戶部尚書兼建極殿大學士余仲丁有丁

吏部尚書兼建極殿大學士趙汝邁志臯

吏部尚書兼中樞殿大學士沈肩吾一貫

吏部尚書兼文華殿大學士朱少欽縣

終

兩浙名賢錄卷之十四

東海徐象梅仲和氏謨

黃國阮維岳爾鎮氏

輔弼

明 共十四人

東閣大學士吳濬仲沉

吳沉字濬仲蘭谿人故元禮部郎中師道子沉與兄深傳其家學名重一時元累辟不就洪武十二年郡以儒學博士舉至京師誤上其名曰信仲既除翰林國史院

待制謂修撰王釐曰。名旣誤矣。冒昧而不更。是欺罔也。釐以國法方嚴。恐觸犯天威。固止。沉沉不從。毅然往吏部告請改正。部以聞。高皇帝大喜曰。是誠格人也。遂春遇之。上御奉天門視朝畢。謂沉曰。人君治天下。莫要於進賢納諫。兩事沉曰。求之於古。克行者鮮矣。是故亂日常多。治日常少。上曰。使其真知賢者能興其國。何有不好。真知諫者。在於忠已。何有不納。惟其知之不真。是以於已難入。若誠能好賢。則不待招徠而賢者自至。能納諫。則不待旌賞而諫者畢集矣。沉曰。陛下之

言及此國家興治之要。未幾奏對錯誤降爲編修。尋復以爲待制。時給事中鄒相同奏言尊無二上。稱臣於東宮。是竝所尊矣。沉駁之曰。東宮國之大本。所以繼聖體承天位者也。臣子尊敬之禮。安得有異。請凡啟事東宮如舊制。上從之。無何復坐奏對失旨降涇源縣學教諭。未行留爲翰林典籍。未幾以爲東閣大學士。先是上將享太廟。致齋於武英殿。召沉等謂之曰。朕聞古昔聖賢書其垂訓立教。大約有三。曰敬。天曰忠。君曰孝。親。君能敬。天臣能忠。君子能孝。親。則人道立矣。然其

言散在經傳未易會其要領爾等宜類編三事爲書其  
是書成名曰精誠錄上覽而善之命沉誤序上御  
謹身殿沉進講周書至國則罔有立政用檢人上曰  
甚矣國家不可有小人有小入必敗君子故唐虞用舜  
禹必去四凶魯用仲尼必誅正郊沉進曰書言去邴邴  
疑所以深致其戒俄以進講後期考功監勅其忠於職  
事降侍書尋改國子博士是時文治大興沉獨謂其不  
可廢因言武經七書多依託之言惟司馬法與孫臏書  
可信昔者齊威王與其大夫追論古司馬兵法附以田

穰苴之說今所傳者非齊之全書宜孫吳之盛行也聖  
人之兵昭文德而威不執者也所以生人也非殺人也  
禦亂也非爲亂也尚義也非尚詐也孫子曰兵詭道也  
吾恐非聖人意也間嘗以易詩書禮論孟諸經詞義有  
涉於戎事者輯而類之定爲五篇一曰兵象二曰兵用  
三曰兵禮四曰兵詩五曰兵訓總而題之曰六經師律  
又嘗著論以孔子封王爲非禮其後布政使夏寅祭酒  
丘濬皆以封孔子王及謚爲非禮卒去號稱師正數十  
年之謬誤者沉倡議之力也沉富蓄遠覽志負經濟三



進三黜而無喜愠人以此多之

戶部尚書少保兼太子少傅夏惟詰原吉

夏原吉字惟詰其先會稽人徙饒之德興父時敏國初  
爲湘陰教諭因家焉母夢三閭大夫入其室生吉吉生  
有異資年十三喪父卽刻志向學以詩經領鄉薦卒業  
太學選入內庭書制誥擢任戶部主事洪武三十一年  
陞本部右侍郎命克採訪使巡撫福建尋又出鎮蘄州  
太宗皇帝入正大統召還轉左侍郎踰月陞本部尚書  
上勵精圖治凡建文時條教政令有所更革者皆命吉

申明之凡三十餘事。明年兩浙大水。命吉往治。且命都御史俞士吉。齊水利。集賜之。徧詢故老。水之源委。磨使兵民數萬。撫恤之。人人盡力。布衣徒步。晝夜經畫。民爲之。赤。盛暑。或持蓋至。曰。衆赤體。暴日中。吾何忍求涼。決壅滯。修隄浦。濬溝洫。治橋梁。導水入海。水不爲患。又奏發粟萬餘石。以賑飢。給牛具穀種。與民之無力者。與人懷之。姚廣孝還自浙西。上首詢吉。廣孝曰。夏原吉古之遺愛也。召還掌部事。請裁冗食。平賦役。均出入。勿使勢要者種塩。以妨商賈。勿使富貴家專錢。以沮貿易。清

倉場廣屯種皆立定規以施諸天下時建文廢弛之後  
靖難之師方息府庫空虛無蓄積一時賜予功臣賞給  
士卒大封親藩增制武衛添設百司而又召集天下儒  
生數百人於館閣編輯大典未幾遣二十五將軍大興  
安南之役遣內官造巨艦航西南大洋海以通諸番財  
用之費以億萬計皆取給於戶部吉晝夜焦勞經營經  
甚惟恐拂上意而殫民財時初建北京官殿採木運  
餉命吉出巡視給以錦衣官校四十人律罪怠事者吉  
將登車乃遣人馳諭官吏軍民各處乃事吉將出蹇蓋

恐犯者衆也。人人感悅而事集八年。上親征北虜命

輔導。皇孫留守北京。兼掌行在六部都察院大理寺

事。諭之曰。朕以房玄齡委卿。卿其盡心輔導。時京邑諸

司草創。吉每旦入朝。獨近宸前。叅決機務。退至政事堂。

郎官御史抱案盈庭。吉口應手。判不動聲色。比奏行。

在南。啟東宮。京師肅然。七月。駕回北京。吉見便殿。

上曰。卿輔導皇孫。居守事。安民安。叅決機務。咸當朕心。

吉曰。陛下之訓。皇太孫遵行之。臣何功之有。翌日

上諭羣臣曰。夏原吉輔導皇孫。今之周公也。十九年。

三殿災吉言愛民所以敬天也乞蠲逋負及芻糧採辦  
金銀課程優卹流移以回天意從之詔求直言言者多  
云建都北京不便主事蕭儀言之尤峻上怒誅之時  
科道亦云不當輕去金陵上曰方遷都時吾與大臣  
密議數月而行言者因劾大臣上命言官與大臣俱  
跪午門前封辯都御史陳瑛言科道皆白面書生不知  
大計上命左右至午門前問衆皆啐罵言官吉衡奏  
曰御史給事職當言路且應詔陳言臣等備員大臣不  
能協贊大議臣等之罪也上悅兩宥之交趾平上

問吉陞賞孰便吉對以賞費於一時有限陞費于後日  
無窮乃陞首功餘皆班賚西域法王來朝上將親勞  
之吉曰彼慕化而來宜示以君臣之禮且上如是下必  
有甚焉上曰爾欲效韓愈耶他日法王見便殿上  
命吉拜吉曰王臣雖微加於諸侯之上况夷狄乎臣恐  
一屈膝有辱天子臣死不敢奉詔上曰卿過侍郎楊  
勉之拜獮猴遠矣山東妖人唐賽兒黨三千餘人至吉  
入奏曰諸所俘俱平民悉原之衆遮道呼公生我吉叱  
曰朝廷之恩我何與焉十九年議親征北虜羣臣無

敢諫吉曰我受國厚恩不可不死爭約尚書方賓同謀  
曰公但來吾自言之入叩頭言頻年師出無功軍馬儲  
積十喪八九況今災青厲作內外俱疲聖體少安遠  
涉風沙誠爲未便上怒乃命吉整邊儲於北口賓懼  
自縊遂併籍吉家命錦衣官立取吉回至則大起厥理  
儲錦衣促之吉曰姑俟畢此不然恐有侵死吾安之不  
以累公及至上問征虜得失吉對如初歷言自古不  
勤遠畧之意命繫於內官監皇太孫屢請赦之上  
命中使覘其動靜因問上待公厚今繫之暴亦有怨

乎吉曰風雨霜露無非教也何敢怨上意頗解猶繫

之。上至榆木川不豫。顧左右曰夏原吉愛我八月計

至。仁宗皇帝卽位卽日復吉官吉以母喪未終辭

仁宗勉留之曰國家不幸有大事正賴相與共濟艱難

安得遽去卿云有喪我無喪乎如卿辭職朕亦不當在

此吉不敢復言賜賻禮遣官護其喪歸營葬事宣宗

以皇太孫正位東宮加吉太子少傅時呂震爲太子少

師班在吉右卽進少保仍兼職如故食三俸同時大臣

當受誥命翰林呈草上取筆增二語曰勿謂崇高而



難入勿以有所從違而或怠且諭學士楊士奇等曰此  
實朕心蓋望卿等匡輔之功也繼召吉等至宸前賜銀  
章其文曰繩愆糾繆且諭曰朕有過舉卿卽具奏來  
以此識之朕不難於從善也以吉有匡輔功賜第二區  
田五頃仁宗賓天預聞顧命時宜宗爲皇太子監  
國南京遣命徵還嗣位時有漢庶人之疑中外洶洶羣  
臣欲出郊迎太后命獨留吉同襄王留守京師輔臣  
郊見宣廟首問吉及少師蹇義衆等不能對旣至召  
吉慰曰朕聞太后諭知留卿意卿奉皇祖合輔朕

有年非他人比卿當以所事 皇祖者事朕賜寶帶

宜廟既嗣位吉以舊輔倚毗尤重宣德元年漢庶人反  
移檄誣輔臣姦邪亂政以吉爲首 上夜召吉等入議  
吉免冠謝曰臣不才致變親藩罪當死 上曰卿何爲  
是言彼蓋假卿以興兵耳休戚與卿同之命吉坐寤議  
屏左右語楊文敏榮首勅 上親征 上難之顧吉吉  
曰往事可鑒不可失也臣昨見命將而其色變退語臣  
等而泣在廷如此則其臨事可知又曰兵事貴速且有  
聲宜卷甲韜戈而往一鼓而平之所謂先人有奪人之

心也。榮言是。上意遂決。卽躬帥六師征之。晝夜兼程。而往。師臨城下。罪人斯得。太被恩賞。賜吉闇者三人。被吉朝奉出入。吉固辭曰。舊制非勲臣不敢用。上曰。卿輔導忠勤。非勲而何。乃拜賜。是歲扈從。車駕巡邊。旣還。上以蹇義及吉等四人年老。不欲煩以有司之政。勅吉曰。卿等事祖宗。積效勤誠。朕嗣統以來。尤資贊輔。夙夜在念。圖善始終。蓋以卿等春秋高尚。典劇司優老待賢禮。非攸當。况師保之重。寅亮爲職。不煩庶政。乃副倚毗。可輟部務。朝夕在朕左右。相與討論。至理共寧。

邦家其專精神，審思慮，益致嘉猷，用稱朕倚眷老成之意。又賜銀章一，其文曰：含弘貞靜。蓋以褒吉之德。量云：五年兩朝實錄成，賜宴於中府。明旦入謝，既退，得微疾。命家具湯浴，正襟端坐而薨。年六十有五。上聞訃，震悼，命有司製棺，給賻營葬。遣禮部尚書胡濙諭祭，贈特進光祿大夫、太師，謚忠靖。官其子瑄爲尚寶司丞。仍復其家。吉天性孝友，平生與物無忤，受人之惠，雖微必報。心無適莫，渾渾然不見圭角。小人有所觸犯，虧損置之不問。平居無事，坦坦如也。一遇事，明敏奮發，嘗奉命

理諸司政務吏牘滿前迎見立解拔根適節各得其宜  
商功計利惟恐有弊恒曰不可使後人難爲繼而戕吾  
民也其掌國計最久凡所建置區畫明於閭閻歛散之  
術科分戶別有倫有要一一可爲後世法歷事四聖  
隨事獻忠凡持論必歸仁厚存大體天下之人陰受其  
賜者多矣一時大臣與吉同功一體者惟蹇文定公義  
時以蹇夏並稱然蹇特以政事著稱於時而吉兼有文  
學之譽自開國以來三大纂修皆吉爲總裁所著有文  
集若干卷傳於世丘文莊濟論曰公歷事四朝始終

幾五十年專掌國計其間雖或兼他官釐別務總理諸司與聞機密未始一日離計相之任也於乎大學治國平天下之要惟在理財用人夫治道亦多端矣聖門授受皆不之及而獨舉理財以並於用人誠以用人爲治莫先財用旣足天下事無不可爲者列聖所以用公之意蓋有得於此昔人論大臣以德量氣節學術才能四者並言謂非兼是不足以當輔弼之任觀公掌國計當內難始定之餘多事紛紜之際國無乏絕民有蓋藏非明於學術優於才能者其能然乎且一時大臣中稱

有德量者。以公爲第一。公其無媿古人所稱大臣者哉。  
少師金世忠忠

金忠字世忠。鄞人。少慷慨負義氣。兄戍通州。忠省兄。會靖難兵起。布衣田冠上謁。典儀云。浙東奇士金忠願見。殿下說兵事。及中朝動靜。得召見。忠言殿下太平皇帝。小人畊江海間。及來往齊魯道上。聞殿下賢譽。服人。心久矣。茲舉大事。人材爲急。成祖悅。立授署紀善。日侍帷幄。贊理戎務。尋陞署長史。已爲真。靖難後。陞工部右侍郎。治事北京。永樂二年。召入兵部。爲尚書。忠博覽史。

籍議論河懸國家大政多出裁決時儲位未定武臣兵  
福等咸謂次子高煦有扈從功請立之上客問忠忠  
歷數古昔嫡孽故事封上喜賜忠大鎰且曰詹事宜  
端汝以尚書兼詹事幸善調護佐太子忠侍監國時時  
勸起孝敬尊友愛小心敬慎無失禮毀譽禍福聽諸天  
而已或譖誘廷臣及宮僚過者上密令忠察審忠退  
每數日頓首再三爲白無此事願陛下寬宥上或不  
喜卽又頓首言臣敢保其無他他日有踪跡卽如人言  
臣甘連坐以故諸所全護者多忠謹厚不泄人亦不知



也。忠每導人寬愛，無爲苛刻。公事輒推同官，使展其才，能有闕誤，引爲已過，不遺片善，不念舊惡，俸賜有餘，周賑鄉族。太子卽位，念忠輔導功，贈少師，謚忠襄。以其子達爲翰林檢討。達幼，遣歸依親讀書，比長，景陵召還翰林。正統十二年，改禮科給事中。景泰改元，遷都，給事中，剛直敢言，無所避忌。愴小多憚之。二年，出爲長蘆都轉運鹽使。

戶部尚書兼武英殿大學士黃崇謙

黃淮，字崇謙，溫之永嘉人。洪武丁丑進士，除中書舍人。

太宗文皇帝入繼大統召見訪以大政稱旨卽命入翰林每設朝特命淮與解縉立於御榻之左以備顧問

上慮萬機繁脞日御奉天門左室每夕召淮語至夜分上或就寢則賜坐榻前論議雖同列不得與聞已而命居內閣專掌制勅又選湖廣楊士奇楊榮金幼孜胡廣與之同事甲申會試天下士與解縉爲主考得曾榮等四百七十二人上以多才色喜上欲立東宮密問淮淮曰立嫡以長萬世正法上意遂決皇太子旣立命以右春坊大學士仍兼侍讀進講東宮啟沃良多

復勅兼輔導。皇太孫賜袍笏寵眷日隆。當是時。上每北狩。命淮與尚書兼詹事蹇義金忠諭德楊士奇留守。諭之曰。朕留汝四人居守。循唐太宗簡輔監國。必付房玄齡卿等。其識朕意。明年上親征胡虜。適長沙妖人李法良作亂。皇太子命豐城侯李彬率兵剿捕。而漢王設疑沮之。皇太子以問淮。淮曰。豐城老將。必能成功。兵貴神速。宜急遣以掩其不備。既而法良就擒。一如淮言。癸巳。駕再狩。淮留守如故。時漢王潛蓄奪嫡之志。忌淮獨深。日夜窺伺間隙。流言監國之過。淮遂免。

歸一滯十年處困中惟日賦詩自遣無非引咎責躬而已名其詩曰省愆集洪熙改元陞少保戶部尚書兼武英殿大學士是夏上不豫時皇太子往南京省謁孝陵遣使召還旣而宮車宴駕羣情洶洶淮與楊榮楊士奇佐襄鄭二王監國憂勞至於咽血及皇太子還京卽位大事始定宣德元年八月漢庶人反淮勸上幸師親征上以淮多病留佐襄鄭二王監國淮夙夜在公至班師方歸私第疾益甚乞骸骨不許固請始令歸田養疾賜楮錢萬貫父歿遣禮官賜祭命有司督葬

既襄事拜恩闕下。上寵留彌月。賜游西苑。命淮乘肩輿登萬歲山。賜宴於山之麓。明日獻詩以謝。上大悅。比辭宴餞於太液池。親酒宸翰。製詩送之。給路費。賜金織紗衣一襲。且諭之曰。明年朕生日。卿其復來。明年如期入覲。宴賜之禮。有加於初。九月辭還。又明年上崩。正統改元。淮入朝。進香寵賚優渥。留月餘。辭歸。淮在永樂初。知無不言。言無不聽。嘗有告黨逆者。淮曰。洪武末年。已有勅禁革。不宜復舉。從之。而大獄遂息。虜酋阿魯台既納款。欲收女真土蕃諸部。聽其約束。請朝廷刻誓。

詞於金鑑集諸部長磨酒飲之以盟淮曰胡人狼子野心使各自爲心則易制若併爲一則愈難制矣豈可慮其奸謀上顧左右曰黃淮如立高岡無遠不見爾等如立平地所見惟目前耳西域大寶法王初至京上欲刻玉印賜之以璞示淮淮曰朝廷賜諸蕃制勅所用不過勅命廣運二寶今此璞大於二寶夷人將謂法王尊於朝廷也上嘉納之及歸田日謝病杜門不接世故者二十餘年所著有介菴集歸田稿藏於家

吏部尚書兼謹身殿大學士商弘毅輅

商輅字弘載，嚴之淳安人。宣德乙卯，浙江鄉試第一。又十年始登進士第。會試殿試皆第一，授翰林院修撰。尋命進學東閣，繼選經筵展書，陞侍讀，擢入內閣，俾參繪命時。英廟北狩，國勢危疑，妄有倡議南遷者，輅力沮之。虜逼京城，輅與文武大臣經略戰守，遣官撫輯，旬居降虜，徵各邊帥選兵入援，揭榜賊營，購虜酋，偽爲喜寧報誘擒也。先書故遺於虜營，虜得榜與書，果自相疑遁去。景泰紀元之秋，往迎。英廟回鑾於居庸關，草詔稱旨，賜以馬匹。既而錦衣指揮盧忠妄言南內事中官阮

浪等雖被重刑猶窮治不已輅極言不可輕聽以壞太  
倫傷骨肉之情獄遂不竟無何而易儲議起輅謂此國  
大事有皇太后在上臣下誰敢議此明日有旨會衆  
官議附和者衆輅力爭不可踰歲鍾同章綸相繼請復  
儲下獄禍且不測輅因召對力救綸竟得免丁丑春

景皇帝不豫輅卽與陳循倡請復儲以繫人心不允繼  
具草輅援筆增二語云陛下爲宜宗章皇帝之子當

立宜宗章皇帝之孫擬詰旦進至期變作正月十七  
日也英廟復辟首召慰諭且問改元明日惟好嗟否



官摺撫再劾。坐免。成化丙戌。召起復原官。仍參預機密。首言八事。舉切時弊。戊子。慈懿皇太后崩。輅率羣臣上疏。定祔葬之禮。至伏闕泣請。卒從之。陞兵部尚書兼職如故。蕃酋滿四叛。官軍往討。未下。廷臣有欲再出師邀功者。至有危語。輅力執不可。未幾捷至。上喜。賜俘奴各一人。改戶部兼文淵閣大學士。進太子少保。改吏部。時倖臣有欲於掖庭建玉皇祠。每歲以內臣執事。如郊祀儀祭之者。輅力言非禮。訖不建。宮門災。工部請徵材。湖廣等處。輅言上天垂戒。宜少緩修葺。以存警戒。從之。

丁酉命兼謹身殿大學士時樞璫汪直開西廠行事上  
肆羅織屢起大獄勢焰熏灼人不敢言輅偕同列上疏  
極言之會六部大臣亦以爲言遂革西廠由是見憾於  
直會故大學士楊榮曾孫驊有罪不就逮赴京避罪直  
直所發詞連輅輅遂乞致仕詔進少保賜璽書給驛以  
歸卒年七十三訃聞時進榮祿大夫太傅謚文毅輅體  
貌修偉風神秀雅文章典實不事華藻爲人平粹簡重  
寬厚有容登第甫六年卽入內閣預機務儕輩多有異  
議而輅處之自如尤與錢溥不相能溥至作禿婦傳謔

之亦不與之較其再起也。黎淳以景泰中易儲事專歸咎於輅上章攻之輅待之無異平時。君子謂其有大臣之量。子良臣中進士官終翰林侍講。次子良輔孫汝謙俱以蔭得官。良輔刑部主事。汝謙尚寶司丞。

翰林學士內閣呂逢原原

呂原字逢原秀水人。質性渾厚。容貌端偉。未冠已讀書博洽。能出入經文。父嗣芳萬泉教諭。兄本爲景州學正。父隨兄之任相繼卒於景州。貧不能歸喪。或勸原火葬。原痛哭不肯從。權厝景州。時時至墓所慟哭。行人聞者。

皆爲之酸慙已而奉母南歸家益貧攻苦力學知府黃  
懋閣秀水學官文奇學官對曰此邑里中呂生文也呂  
生貧不能補弟子員學官致家塾教諸子懋輒歎郡中  
乃有文士如呂生遺草萊中者急召見源源入見衣纒  
纓甚試之舉業文詞理皆勝問之經書輒能默誦講析  
懋益驚異與之新衣謝不受會理葺黌舍與之諸餘材  
木又謝不受懋曰生家貧粥此且得善價又謝不能太  
守益大奇呂生當是時太守得輒補學諸生懋卽遣原  
入試是秋發解浙江第一明年進士第二人入翰林

正統七年也。方選翰林講讀官。裴綸、杜寧、謝璉、王玉江、淵、陳文、李紹、商輅、劉俊及原十人習制誥於東閣。十四年罷。景泰中倪謙及原初教小內官黃賜等七人書於文華殿東廡。上一日至廡中命二人講謙講詩國風原講書堯典。上悅。問二人官。謙對臣左中允兼翰林侍講。原對中允右兼侍講。上又問中允講讀官品。二人對曰皆正六品。上曰品同安得相兼。令左右取官制再三覽。顧二人曰進汝二人講讀學士兼中允。二人頓首謝。他日上再至。二人遷坐旁壁下。上曰何弱。

躋乃爾二人頓首對。君父嘗臨坐臣子避不敢當。上喜二人敬慎。後至館輒立語。或東西行不復坐。天順初改通政左參議。仍兼侍講。入內閣尋陞翰林學士。時曹石寵用事。知敬原原朝會。衣青袍。亨笑曰。行爲先生易緋原不答。未幾岳正暨原列上曹石罪狀。上留中不發。曹石微覺。上意大恐。遂共謀摘承天門災詔中語。謂內閣臣訕。上上大怒。坐便殿召對近臣。厲聲曰。正大膽。固敢爾。原素謹厚。左右正何也。正旣去。原得留。與李賢同。在內閣。李賢通達。見事立斷。原守正謹。恪恭。

濟之持重。修大明一統志。充總裁。無何以母憂去。道經  
州。啟父窆。歸合葬。或以陰陽五行家說沮原。不聽。奉載  
舟中。寢苦。枕塊極哀。毀竟病。抵家未及窆而卒。時年四  
十五。贈禮部左侍郎。謚文懿。原在內閣六年。端潔不苟。  
取子性儉約。身無統綺。篋中惟賜衣。幾襲輒分。祿贍宗  
姻貧。置者清心寡欲。第無隱過。至老勤學。晨夕不少。  
輟子憲。歷官太常卿。自有傳。

戶部尚書謹身殿大學士謝于喬遷

謝遷字于喬。其先世出自河南陽夏。太傅文靖公安顯。

於東晉遂寓會稽後徙台之臨海少傅惠正公深甫與  
於南宋復自臨海徙餘姚遂爲餘姚人凡七傳而至遷  
父塋仕終福建布政司都事多開釋無辜人謂其必有  
後及遷生而穎異不凡識者以遠大期之且曰他日名  
位視晉太傅宋少傅蓋不多讓而當今天下全盛以其  
才之所就勲烈殆將過之時人未之信也年二十六舉  
成化甲午鄉試第一人乙未會試爲第三人廷試爲第  
一甲第一人授翰林院修撰簡侍東宮弘治初陞庶子  
充日講官上在諒陰內侍郭鐫請選妃嬪以備太



遷疏言。大行在。願豈宜有此。俟陵畢。徐議之。未晚也。  
命禮部議如還言。尋陞少詹事兼侍讀學士。上方勸  
學。還務積誠以開悟聖聰。每先期輒焚香莊誦如侍天  
顏。及當講敷暢詳明。甚稱上意。無何以憂去。服除起  
爲詹事。簡入內閣。加少傅。兼太子太傅。禮部尚書。武英  
殿大學士。虜犯大同。兵部尚書馬文昇以國用不足。請  
加南方折銀舊額。還執不可。曰。南方稅銀甚重。宜德正  
統間。因民不堪命。故立折銀法以寬之。今更加則反重  
於本色。民益病矣。且足國惟在節用。苟用之不節。加賦

何益不謂文昇而有此疏事遂察四方解戶赴內府輸納者每苦需勑還乘間言之上令擬旨禁約還曰虛言設禁無益也須令曹司搜剔弊端明白開奏而後嚴立禁條有犯必誅庶幾民困少甦上悅卽如其言行之由是諸司宿弊如洗時同在內閣者劉健敢於任事而資遷之謀斷李東陽長於爲文而資遷之典則遷於其間不激不阿弼成盛治一時號稱賢相嘗欲引吳寬與共事而同列難之因乞避位薦吳寬王鏊自代中外服其恬讓泰陵大漸入受顧命正德初奄瑾專政

書韓文率百官伏闕論之。遷等主張於內，將寘璫於地。事泄不克，遷遂乞致仕去。璫恨遷甚，指爲姦黨，榜示天下。又矯旨勒遷弟武選員外郎廸致仕，子編修丕除名。璫怒不已，禍且叵測。人皆危之。遷曰：「天祐皇明，我當無他。」不見劉元城之事乎？處之泰然。世廟登極，遣使存問，遷上疏謝，因陳學祖訓監成憲二事。六年二月，復召入內閣。既至，歷於同列，不得展其志。明年四月，乞歸。士一年卒，年八十有三。贈太傅，謚文正。遷器宇豐厚，風神秀朗，見者知其爲壽俊。元臣其忠誠，端慤始終不渝所。

謂清白之操百練愈精剛毅之氣萬人必往誠有如聖  
論者學以明義理爲先爲文正大溫厚不事雕琢然未  
嘗輕以一字假人其初入翰林時有御史某驟陞都憲  
臺中循例乞遷文爲賀遷曰此人素不滿於公論吾柰  
何以諛言悅之卒不作嘗憫鄉人方正學以忠滅族沉  
鬱百年不避忌諱收綴遺文已而得赤城論諫錄遜志  
齋集赤城詩集皆手目訂正以表章之天地正氣沉鬱  
百年而幾泯者一旦遂得其全以顯行於世文正之功  
大矣

吏部尚書謹身殿大學士張茂恭孚敬

張孚敬字茂恭永嘉人貌魁傑有大志年二十四舉於鄉數上禮部不利歸而聚徒教授姚溪山中扁其讀書所曰羅峯書院羅峯孚敬所自號也又二十二年而中禮部試時天子方南巡其明年世宗皇帝卽位始臨軒策進士得第二甲隸事大理時上以興世子入繼大統下廷臣議所以尊崇獻皇帝后者久之不決孚敬上書大略言上旣以興世子入繼武宗皇帝統非繼武宗嗣也今以後武宗則弟以後孝宗

孝宗自有子奈何舍 獻帝勿考而考 孝宗使 獻  
帝有子而無子 上有父而無父哉時 上心是之而  
迫於輔臣禮官議報聞孚敬亦去爲南京刑部主事乃  
下議議尊 孝宗曰皇考 獻帝曰本生父而孚敬復  
上書爭之曰是二本也 孝宗法得稱皇伯考不得稱  
考 獻帝得稱考不得稱本生因上所草或問二篇於  
是桂萼疏亦上具如孚敬指而中外士大夫咸側目二  
人思歸之矣然 天子益已心動而方獻夫霍韜輩益  
推緣孚敬說而進之 天子用以連柱輔臣禮官口是

三下詔始定召孚敬與萼超拜翰林院學士孚敬雖以驟顯重然猶不能容公卿間而益仇仇自發舒亡所避天子愈器之明年進詹事爲經筵講官又明年遷兵部右侍郎俄轉左其學士侍經筵如故孚敬數與尚書持論事卽執政策邊事欲屈其尚書孚敬復爲尚書持之至抗疏辨上輒伸其說時御史錄案山西有所逮張寅者以爲卽故妖人李福達也而侯勛爲居間御史卽劾勛詔下三法司獄獄成上獨疑三法司黨御史而傾侯勛以屬孚敬與桂萼方獻夫雜治之竟反其獄孚

領都察院賜二品服金帶遂以禮部尚書兼文淵閣大學士輔政仍領都察院賜勅約束中外御史所以褒獎殊至賜玉帶孚敬念以書生片言當人主意非久取相位思有所報故大要以破人臣之私交而離其黨一意奉公守法卽怨謫弗卹也尋賜銀記二一日忠貞貞一曰繩愆糾繆得密疏言事上旣以尊崇獻皇帝后錄前後諸臣議而取衷於孚敬書成名之曰明倫大典進孚敬少傅太子太傅吏部尚書謹身殿大學士予四代誥官一子是時楊一清居首揆以才受上知



然不能如孚敬深而上所嘗問孚敬者月以十數時  
時稱孚敬別號及字而不名時桂萼亦入輔名寵俱亞  
孚敬而所言事不能無相左以故稍不平爲惡語交關  
上前清因以計巧中之而會給事中陸粲孫文奎論  
其事因勅孚敬歸創省待用而革萼散官致仕孚敬至  
天津復召歸寵益甚乃請避上二名諱上乃大書  
今名字填以金賜之又賜銀印其文曰永嘉張茂恭  
上嘗諭孚敬留部天下首地而事皆中貴人專之何侍  
也擇宗室一人留守便孚敬言高皇帝以親王領宗

正不久而罷之宗室不預政久矣臣不敢奉詔自是乃  
數數言中貴人暴橫狀上爲悉裁革鎮守監槍市舶  
之類後先殆盡天下欣欣想望太平而孚敬又自言禮  
起上以明聖述作爲任事取孚敬裁定若分祭天地  
北郊尋壇於東西爲朝日夕月正先師號易象而主帝  
后行耕蠶禮皆其大者會居第成以獻帝書含春堂  
及金幣羊酒賀而所讀書姚溪山中者書院下有司爲  
新之賜名曰貞義其堂額曰抱忠時夏文愍言亦以言  
禮貴驟當上意於孚敬不能盡合而會雷震午門西

片有言乎敬橫者乃乞休無何召復位進兼太子太師  
再乞休再召進少師時昭聖皇太后於上有推立  
恩而上所生章聖皇太后日重昭聖猶以故事  
裁之不爲下上不擇而昭聖之弟昌國公鶴齡建  
昌侯延齡者早倖橫燕中所爲多不法既微知上指  
恐憚甚而燕中少年無賴蜂起爭持脅其金帛毋算後  
稍稍不能酬乃上變言其詛魔怨望大逆殺人事下獄  
按皆誣罔獨延齡殺人頗有狀昭聖迫乃因上後  
官有他慶以延齡請上益怒遂欲坐延齡反族其家

乎敬固以爲延齡殺人抵償當而坐之反族不可夫延  
齡財虜耳何以能反凡數詰問具對如初乃論延齡殺  
人罪屈秋盡當論乎敬復上疏謂 昭聖太后春秋已  
高卒聞延齡死能不內傷痛乎萬一不食有他故何以  
慰 敬皇帝在天之靈 上恚謂乎敬自古強臣令君  
非一若今愛死囚令我矣當自悔不從延和邪延和者  
初持考 敬皇帝相也 上故爲重語欲以惕止乎敬  
乎敬持不已乃下詔悉緩諸當論者而終乎敬與 太  
后延齡得長繫矣乎敬爲相務以明天子尊信國威

重輔臣體。而其初潞州盜陳卿據青羊山殺官吏中外頗務姑息爲撫安計。而孚敬獨破之。卒捕誅卿大同叛卒殺其將孚敬益自信薦劉源清鄒永爲大帥以必得賊爲主而所薦頗不任帥賊挾虜以重僅購得一二主謀者夏文愍以撫之說進而孚敬稍屈矣。孚敬恚甚會哭子成疾上疏乞歸不許請益力上待之益厚至手調藥以賜曰古有剪鬚和藥者吾手調亦庶幾焉其專精神加於自愛以輔朕爲忠之大孚敬感泣疾益甚以死誓歸上知不可奪乃許致仕明年遣錦衣緹騎帥

來視疾且促還朝強起至處州疾作歸再起至金華疾復作歸又三年而卒年六十有五贈太師謚文忠孚敏在公車最久而其成進士僅六載而拜相天子之以禮信之者自明興無兩凡所創革典制雖上自信以天啓而得之孚敏者深矣孚敏博洽典籍所撰對班班可據其所以合非偶然也顧性頗驕兒視其僚好慢罵所擬調任喜怒不復反家居自尊大部邑守令伏謁長跪土木之功冠東南而囊無長物歿未幾居第侵風雨力不能飭子弟多假貸於人以自食至今稱其庶

禮部尚書武英殿大學士呂汝立本

呂本字汝立餘姚人父改以子貴稱太公楊太夫人方孕而棲居夢日卓午爍庭中赤光四表既寤而本生食其樓曰瑞日徵貴也太公故善謝文正則以負劍見本文正奇之斯其殷帝之首服也稍長執博士業文正益奇之曰夫夫國工也異日者當出吾上館之家塾屬其子學士丕程督之學士入朝載之俱北紹介而見之費文憲亦以公輔器之戊子與計偕壬辰舉進士以庶吉士授國史檢討出就南國子司業以右中允攝翰林院

轉左樞左春坊丙午主試揭禮樂征伐自天子出爲首  
義錄呈稱吉簡在帝心戊申迺陞兩京國子祭酒甲  
年上命增置夾輔枚卜者六人本以少詹事入閣辦  
事尋召入直廬陞吏部右侍郎東閣大學士癸丑上  
修輔臣功陞禮部尚書進太子太保兼文淵閣大學士  
尋加少保兼武英殿大學士歷一品考進階光祿大夫  
勲柱國兼太子太傅當是時上明如日月威如雷霆  
百官受成莫不凜凜分宜耄矣胄子無良華亭肩隨深  
中重發獨本以赤心上結明主斷斷無他猶之清廟



舉刀和而後割庚戌秋八月虜薄郊關上御永壽宮  
召入直諸臣問方略本奏曰諸臣民仰望天顏久矣請  
亟出視朝安中外心旣則以郊保僵口瘡痍就死請亟  
下令掩骼埋胔發賑捐租京營故多糜軍請亟更張以  
善後疏再奏悉嘉納之旣又言威寧侯鸞調邊兵入衛  
以其習戰足當虜鋒也今奏自部營兵以距前茅發邊  
兵於邊外以斷後殿臣所未喻且督餉都御史隨地餉  
軍不爲不預鸞復要戶部載備從征甚則秣馬許掠田  
禾許之許者也邊臣請互市廷臣持之上問本本極

言不可往虜猝入不及爲謀第一市以緩之因將集兵  
力大創之耳乃令兵力方集籍令虜入正宜張天討以  
振國威犬羊無厭何示之弱也 上曰善悉罷市議毋  
開端徐邳水溢飢民輕爲邪 上用本言命漕河二水  
御史併力疏濬發徐淮倉糧四萬石兩淮餘鹽銀五萬  
兩遣刑部侍郎吳鵬出賑之水乃就道而飢民安堵天  
壽山水爲患衝嚙諸陵神道 上遣本視之特旨問狀  
對曰二水交衝故多潰決河勢環抱法中堪輿形勝不  
當更工費不當惜第濬河深廣下如建瓴可無患矣其

年大同歲豐一緡幾得十石請發度支銀十五萬贖糶以佐軍興較之年終可省三倍先是巴西莊敬太子立無何薨上諱言儲言者見坐本言自古帝王莫不早建太子將以正國本繫人心祖宗以來太子諸王年十五以上則冠婚出閣第本支典禮必先正名且天授元良不可以徃事槩論不納壬子春裕王始冠本行贊冠禮明年請二王就宮中婚上問故對曰名分未正不宜竝出而婚耦則上疑軋則下貳且先朝同在宮禁有太后有中宮有東宮今陛下骨肉親惟二王耳

出居外獨柰何自輕卒不納明年復請寢如初庚申故  
左中允郭希顏上書謬以建帝立儲爲發語上大怒  
傳上刑本言小臣妄言建帝罪當死但二王同居分邸  
寓內莫測淵衷其在天倫則聖心密定久矣徒以已  
酉爲鑒篤愛元良誠如所言一留京一之國人心自定  
寧詎以人廢言上心然之卽諭輔臣景王當遵祖制  
令之國辛之翊穆廟開太平本之力也無何而太夫  
人卒上下卹典遣行人護喪歸葬本具疏謝以哀毀  
聞先是島夷弄兵諸郡縣盡城守姚故城江北本紹介

所部請夾江而城如通州淮安臨清倚角相守均之赤  
子寧詎置之度外邪。佻者以爲譁不用命。本曰吾未奉  
天子命而興大役。譁固當。屬江南諸有位者上書。下司  
空議。旣得請。則胡督府董成迄竣事。而民不知役。於是  
人人頌本功德。祠祀之。龍山本旣家食。察民間大不便  
者言之有司。請屢畝。請均糧。旣則徵徭銀罷優免。由是  
租庸有調。民力以紓。直指使以其狀上之。絜爲令。萬曆  
十一年。年登大耋。遣使存問如禮。丁亥。諸子姓以初度  
稱觴。無何而疾作。隣里聞室中鼓樂聲。乃卒。年八十有

四賜祭九壇遣行人治葬贈太傅謚文安本自通籍以  
至居喪凡三十年都文學侍從者十有七都相位者十  
有三雅言避名避利避權三者惟恐其不去也而端行  
卻步卒後其身而身先焉初上下相始得本下內閣  
議授秩分宜審遣家監以告稿之十緡家監銜之改少  
詹秩視大司成等華亭入相後本者四年本引身下之  
遂躡本上卒之分宜凶終華亭滋大惟本聲實純粹卽  
有口者不能訾其休休之度云

戶部尚書建極殿大學士袁懋中煒

袁煒字懋中，漢太尉安之裔也。避亂居勾章之南鄉。世  
欽德弗耀，至父汝舟以學行聞人，稱端居先生。與妻汪  
夫人同日夢黑龍降於家。時煒將誕，相慶曰：「若生兒，當  
非常，必亢吾宗。」已而煒生，果異。穎五歲，能屬對，多奇語。  
十歲，習舉子業，讀書過目輒成誦。十七，補縣學生。淹貫  
經史，人稱博雅。嘉靖丁酉，舉鄉試第二。明年，會試第一。  
廷試第三，授翰林院編修。以外艱歸。服除，同考會試，充  
纂修會典官冊，封唐府充副使。盡却所餽遺。唐王改容  
禮之，遷侍講，以繼母憂歸。服除，主順天鄉試。時上簡

詞臣撰文煒在選顧上見煒文獨稱善遂有襲衣白金之賜內閣以煒資深題掌南京翰林院事煒上疏願留供文撰上嘉悅擢爲侍講學士特進禮部右侍郎兼原官進太子賓客兼學士三載秩滿進階通議大夫誥封二代蔭姪大輪爲國子生轉禮部左侍郎賜飛魚服二三年間游歷清華皆出聖衷未幾改吏部左侍郎會吏部尚書吳鵬禮部尚書吳山皆致仕而勅煒兼署二部事當推官與當道論不合執抗再三同事者爲煒危之而持論益堅不少借適上於吏部題缺疏中



進煒太子少保禮部尚書翰林學士越五日召入直皆殊特之恩前此所未有也五月分獻北郊十一月分獻南郊禮成疏請祈雪上諭謂煒敬順天時達禮成性加太子太保戶部尚書武英殿太學士同少師嚴嵩徐階內閣辦事壬戌二月命主會試六日入簾上特遣賜鶴衣御饌於貢院煒感非常知遇殫心校閱所得多瑰奇宏博之士又不受贊禮士風肅然明年八月以萬壽大慶加恩進少保無何而嚴嵩被論謝政去時朝野洶洶上獨察煒清忠亮直諭同少師徐階擬票煒益

秉公竭誠凡事期於至當故海內罔不喁喁望太平之  
治首爲慈民陳便宜三事慈民德之纂修永樂大典充  
總裁書成特進少傅兼太子太傅建極殿大學士尚書  
如故建極殿乃上新制首以授煒令中書賜勅行異  
數也三載秩滿上遣中使賜羊酒寶鏹授柱國誥封  
三代改大輪尚寶司丞煒筮仕二十餘年凡三錫命至  
是而極自簡畀文撰以來恩眷隆渥御膳金帛之賜無  
虛日明良相遇情投魚水可謂千載一時顧以積勞成  
疾再疏乞休上鑒其誠給傳歸就醫藥令大輪護行

舟至安山驛病革呼大輪泣語曰吾沐 聖上殊恩曩  
眷媿不能竭涓埃之報今已矣爾其致身盡職言訖嘆  
咽卒年五十有八是日也風雷大作舟不可行計聞  
上震悼累日遣官諭祭命有司營葬事贈少師謚文榮  
煒賦性剛明風稜嚴整遇事不當意及見人有過輒面  
吐折之然底裏洞徹未嘗有所留匿人亦忘怨焉其事  
親孝伯兄中殞撫其孤如已出蔭先及其長子卽尚寶  
司丞大輪也煒平生不謀家事於世俗所稱珍玩一無  
所好及當端揆尤禁絕請謁而情深故舊每分官俸以

賑給之其才識宏博問學淵奧辨析疑義河懸水解援  
筆千百言立就爲詩文富麗莊重卓然成一家言所著  
詩文若干卷藏於家

禮部尚書文淵閣大學士高子象儀

子循學附

高儀字子象錢塘人父鉞以陰德聞夢于肅愍而生儀  
儀少穎異慕肅愍之爲人輒自負嘉靖庚子領鄉薦第  
六明年舉進士二甲第一人改庶吉士授編修時分宜  
方寵倖傾中外悅儀嫺文藻欲羅致門下數遣子世蕃  
及門風旨儀默不應遂大銜忌而名行藝藝益起應然

負當世望時 莊皇帝在潛邸將出講 眞選宮僚所司  
首以儀上詔下而父喪奔還母徐夫人繼卒守制里中  
者四年浙人趙通政者爲分宜狎客得視師浙中精藝  
騎橫於鄉里諸謁者旁趨蒲伏以治屬視之儀弗往也  
趙旣先儀乃報謁中道馳入獨抗禮無所詘趙亦不能  
有加於儀未幾以右中允管國子監司業事而尙通政  
者已官尙書矣屬其甥國學舍中令母卒業而超銓也  
數款曲致謁儀固不可趙恚語人曰何物司業乃尊大  
如此然竟亦不能有加於儀久之陞侍講學士掌南京

翰林院事居南都又三年不遷後來者多踵其上而無  
恬如也會分宜以罪罷去遂以會議陞太常寺卿管國  
子監祭酒事尋進禮部右侍郎明年轉左又改吏部左  
侍郎兼翰林院學士教習庶吉士尋掌院事陞禮部尚  
書兼學士如故世廟方嚮用儀會崩不果先是朝儀  
久曠故籍散失隆慶改元始設宸宇臨羣臣奉祝冊謁  
宗廟具法駕郊見上帝幸辟雍釋奠講經諸大典  
禮威倚辦春曹旦暮待報無從考質儀以其意酌今昔  
之宜修舊起廢燦然明備無不富乎人心舊制合享天

地以日月從嘉靖中乃分建四郊於是中官有請合祀  
復洪武舊制者儀執不可曰洪武初不分祀乎卽分亦  
舊制也何必改作竟寢其議或問合享非與儀曰無論  
非是奈何令中官得與外廷末議衆寢之孝烈皇后  
先以保護功附主世廟儀奉遺詔遷其主內殿而附  
元配孝潔秩然足垂一代彝典他如主薛文清從祀  
華張真人道號及諫免舊邸之遊幸停取先祿之美銀  
竝關切大體詞譴義正讀其疏者無不稱服時神宗  
皇帝方五齡儀敷引漢有司蚤建之議抗疏力請國本

乃定諸藩府名封婚嫁歲久不行者儀悉行之諸大臣  
恩卹當予者雖其後微必爲疏請脫不當予卽多方陳  
乞終勿予也中官數有所屬不可卽執政爲屬之終不  
可執政謂中官高尚書直弃官如敝屣耳誰能奪之以  
故中官率嚴憚儀儀典禮三年紀法無不行者然故多  
病不任勞遂上疏乞休凡十二上乃得請以典禮勞加  
太子少保賜馳驛歸歸之逾年神宗皇帝在東宮且  
出講念先朝舊臣可備係傳者無如儀詔起於家辭不  
許乃單車就道旣至詔日侍東宮講讀於文華東序



進兼文淵閣大學士尚書如故儀負望久數病數起晚而大用中外方想望風采而溘焉逝矣訃聞天子震悼賜卹峻等命以一品禮葬謚曰文端儀體貌魁梧而性簡寡言笑每定大謀斷大義羣情指顧間徐出一二言決之切中肯綮既貴雅飭如書生自視恂恂無他技及見權勢炫赫羣然風靡者若無有也雅恬素絕紛華珍玩之好家不畜姬媵獨文史自娛入官三十年世業不增尺寸舊第既火終其身未嘗營創再歸皆假館於人不以爲意卒而發篋不給飲具門生故吏爲歡飲泣

平儀平生不爲餽遺干謁人亦無有能餽遺干謁之者  
古稱社稷臣招之不來麾之不去其風度蓋如此明興  
以來錢塘著稱者于肅愍高文端其人品位望相埒然  
肅愍遭遇不辰含痛千古而文端完名令終似爲過之  
其夢徵固不虛也詩文若干卷藏於家子循學以蔭授  
中書舍人修正恬雅有父風侍從三十餘年後進者皆  
橫金轡朱而舍人以食俸淺官終七品不悔也年六十  
四自銘其墓而卒曰吾以媿世之好諛者

戶部尚書建極殿大學士余仲丙有丁

余有丁字仲丙，鄞人。宋太保天錫之裔。父永麟，以鄉舉仕爲學官，歷浦江、崑山、擢判蘓州，未上卒。以丁貴，累贈光祿大夫、少傅、兼太子太傅、戶部尚書、建極殿大學士。母王氏，贈一品夫人。永麟少失父母，襁而育之。小江里丁旣貴，當贈三代，喟然流涕曰：「孤不天，不能明其出，顧微夫也。安有吾父恩同罔極，詎敢忘於是！」贈永麟所後父節、節父鍾，皆如丁官。節與鍾妻皆一品夫人。曰：「以此爲吾父報，而吾後世子孫獨祖吾父，蓋以義斷云。」丁生甫一歲，卽博記善問，稍長，日誦數千言，文多閎濬，試

顧冠諸生名日益起家日益落而廣陵郝翁豪長者好  
奇節任俠喜士聞丁名延之家塾爲弟子師居郝氏三  
歲竟資丁遊於太學以順天辛酉鄉舉上春官賜進士  
及第授翰林院編修 莊皇帝卽位入掌制誥嘗曰是  
惟王言柰何私諛人又因以爲利於是戒門者謹謝客  
而詞務簡重得其草者真綸綍不啻乙丑戊辰皆分校  
禮闈所登進者各三十二人而歸太僕沈少宰爲首選  
歸沈皆大雅士其所爲文不阿時好自是舉子業爲之  
一變士依聲慕古以成先資本丁得二士力也丁初持

父喪歸自崑山輒行管高敞地曰卽不可令置萬家壘  
獨奈何不爲異日規制地乎時人未之信也第後四年  
乃請告歸葬郡中人遠近來觀其所謂高敞地咸噴噴  
稱歎曰公固非大言者尋陞國子司業改洗馬兼修撰  
侍 神廟於東宮會登極改右諭德兼侍讀加俸二級  
無何移疾乞歸以左庶子領南詞林得便道之家丁雅  
有山水癖 別業東湖中若將終身焉甲戌起拜南壇  
子祭酒時六館士多喜冶遊者丁令諸生什伍相保連  
坐竟丁任無敢犯無何復移疾歸卧東湖日讀漆園書

又二年起少詹事兼侍讀學士領詞林未至陞太常寺卿管國子祭酒事明年陞禮部右侍郎兼官如故尋改左掌詹事進吏部充會典副總裁三品考滿陞禮部尚書兼文淵閣大學士入閣辦事時江陵新故丁與蒲坂吳門共事凡儉人橫政次第更始嘗夢之帝所手一戈逐巨璫以俘於帝至是實贅巨璫之獄中外快之時浙兵大譟陵犯制府度不可解則蜂屯而搜於市朝遣左司馬張佳胤以節鉞往過丁問計丁曰是窮獸也且致死爭旦夕之命柰何以徒手搏之佳胤還問計將安出

丁曰聞河南人徐景星者有機略舊領此軍今失職特  
事薊門佳胤呼至挾而南景星身居其間亟諭以禍福  
諸軍故信景星爲縛首事者諸軍門謝梟九人於市漸  
兵乃安 皇子生加太子太保禮部尚書武英殿大學  
士蔭一子秘書居一歲從 上定壽官加少保改戶部  
他官如故先是蒲坂以憂去吳門當國丁與祁門鑒前  
之務相矯者冀存大體而江陵旣敗言者尙齟齬不已  
乃至言舜禹之事以搖 上心楊太宰曰不可是欲於  
口語文字之間起大獄邪因覆奏語侵言者言者譁然

誠楊爲佞阿吳門薙請斥罷於是申楊皆避位而祁門  
亦奮起爭之獨丁留閣中外不出一語侵言官而內爲  
上刪白是不甚折退復上疏言申某許某皆名賢傾德  
臣不及遠甚二臣卽去宜先罷臣且言官以發奸爲職  
大臣以國體爲重與其失奸毋寧重國言甚切至而  
上亦自感悟趣下手札慰諭二輔臣而太宰亦復位議  
者謂丁以默止誰得大臣體尋以肺疾專疏乞休不許  
候以雲南大捷錄運籌功加少傅建極殿大學士丁固  
辭乞歸益力上固留不許走中官就問遣醫賜食物



相屬而丁竟不起計聞輟朝一日贈太保諡文敏錫葬視常數加等年五十有八丁素達生生時奉養甚備所居一日必飭亭榭蒔花木以自娛善飲喜賓客客盡滿座非大故不廢絲竹平生不設城府與人多可少杜言輒披肝膽相示遇事輒任亦無成心長老言海上有金塘大樹諸山延袤百餘里今爲甌脫誠使人耕牧其中可資兵餉以寬內地丁曰諾以屬有司有司以爲擾民不可丁曰本爲利民而顧擾之諸君謂不可則不可耳其心無適莫類此婁江王相公錫爵論之曰孔北海

謝太傅頗以嗜好流連取譏當時已而北海抗節漢庭  
名高泰山而太傅鎮安朝野勛烈尤著瓌瑋寥廓之士  
安可以皮相哉余觀文敏之行雅近二君子而協輔  
明聖遭時太平何論北海即太傅亦安所見其功乎  
以爲確論

吏部尚書建極殿大學士趙汝邁志阜

趙志高字汝邁蘭谿人清獻公朴之裔也父賢母張氏  
將生阜而夢日華繞室及生美如冠玉雙目炯炯異此  
兒少遵父訓卽知勤奮弱冠有聲黌序旋舉於鄉屢薦

不售益發憤富於學戊辰成進士第一  
林院編修與修 穆廟實錄陞侍讀 神宗皇帝初政  
倚信江陵江陵以父喪奪情諸疏劾者皆暗激 上怒  
廷杖竄無虛日而編修吳中行趙用賢復繼之旨未下  
臯糾同志者七人以至情大分面詰江陵冀遇吳趙之  
禍吳趙卒廷杖一切劾疏悉不付史局臯以執掌堅請  
之使不得秘江陵怒甚會星變察百僚遂出臯廣東按  
察司副使臯持法平恕吏民悅服間與名士徜徉山水  
間况味恬適若不知有簪紱者而江陵之怒未釋也辛

已例察京僚竟黜臯臯歸築室清獻公祠旁自號六虛  
主人花石漱流爲終焉計明年而江陵死南北臺省交  
薦臯起爲解州同知陞南小太僕寺丞尋擢南國子司  
業歷右諭德掌南翰林院事改左諭德陞祭酒歲餘轉  
少詹事掌府事無何陞南吏部侍郎當是時高資已深  
而官蹟乍北乍南意殊安之又歲餘改吏部左侍郎辛  
卯九月上特旨簡用陞禮部尚書兼東閣大學士與  
太倉王錫爵山陰王家屏同輔政而山陰旋去太倉復  
以省製歸臯獨叅機密無何而寧夏將吏特剽殺撫臣

招套虜據堅城以叛魏總督學曾合諸鎮兵討之入無  
功上怒亟逮學曾下之獄臯薦葉巡撫廖熊代又請  
賜監軍御史梅國楨尚方劍誅不用命者三軍爭奮遂  
擒二賊寧夏平上御門受俘因召對臯從容請赦學  
曾上特爲末減而是時倭夷大發兵且募攻朝鮮朝  
鮮告急臯決策遣將救援旋克平壤而倭創稍稍退此  
二變皆國家所不常有臯甫與政而適兩遭之其經營  
亦艱矣已而太倉還朝會羣臣疏請立東官甚亟  
上乃下三王並封議臯累疏極言其不可並封之議遂

襄自是太倉謝政歸而舉爲首輔夙夜在公思竭股肱  
之力以答主知知無不言言無不盡雖時時逆耳不  
恤也兩宮三殿災每題覆竭誠勸上滌心修省以回  
天譴至開採之使四出舉累疏諫止若臺省部僚因言  
事激觸至杖斥貶竄者舉所以調護營救之者甚力  
上意亦時時爲之轉移卽不盡用其言未嘗不深知其  
忠愛也加官騷子寵賚日蕃舉顧慨然曰言不盡用深  
開多矣奈何虛糜君恩以妨賢路不可則止吾茲決矣  
初朝鮮之後自克平壤倭方奪氣而食人枕惟敬者與

倭通謬許封貢以誤本兵石星星懷甚既謬許惟敢遂  
不聽臯計封貢卒不成而倭遂復謁朝鮮上大怒下  
星於獄意始決戰廟筭方有次第而衆口罪星者因以  
營臯臯杜門謝政迫我兵水陸破倭東事將平而臯病  
劇不可起乞歸彌懇上慰留亦彌篤章數十上不聽  
伏枕三載竟歿邸舍臨歿猶草奏請冊立罷礦稅簡閑  
臣屏言官四事蓋臯歿而冊立東官召起沈歸德未  
會稽卒用臯之言臯居鄉立朝一以誠確謹厚始終不  
替遇事直道而行胷中未嘗著恩怨二字當江陵氣橫

一世時臯挺身折之至困頽靡悔及臯佐天子而  
斂之者亦時交口爲橫語臯非惟不以爲罪且并其姓  
名忘之其雅量爲不可及云

吏部尚書中極殿大學士沈肩吾一貫

沈一貫字肩吾鄞人也自能言父承之以授以書輒成  
誦稍長手一編不勦夏夜辟蚊以兩足納囊中冬常熱  
火達旦十五補庠生嘉靖辛酉舉於鄉戊辰舉禮部第  
四人廷試三甲改庶吉士讀書館中授檢討充纂修

世廟實錄官萬曆改元復充纂修穆廟實錄官甲戌



主考會試同事有以江陵子爲託者。賈曰：某於閱卷見神臨之私安敢曰：相公功在社稷，錄其子不爲私。賈曰：所以糊名易書者何？既知其入矣，謂非私不可。將出榜，同事者復請曰：公不可得毋累吾輩。何？賈曰：休矣。復相公第云：沈生不可。且曰：如有復我者，當鳴鼓於堂，乃止。榜出，江陵爲怫然者久之。未幾，充經筵展書官，又充編纂章奏官，而日講兼經筵之命隨下。故事，日講以正人，卿充，次亦坊局，莫及史官者。時上方勵學，無日不講，而先輩苦疲，故賈以後進充。賈素病羸，求解脫，不得。是

益懈者。投之以艱。使自仆而隨之。以法然。其服官不怠。卒無有得其隙而乘之者。無何以內艱去。服闕。起補講官。貫在經筵。必莊必習。目注。襟若欲排微而入者。一日講至高宗諒陰。進諷曰。托孤寄命。國家大事。必有忠貞不二心之臣。然後可使百官總已以聽。苟非其人。不若躬聽覽之。爲大孝也。江陵色功。壬午。江陵卒。始陞左春坊中允。時爲史官已十年餘矣。尋陞右春坊諭德。進少詹事。兼侍讀學士。晉禮部右侍郎。尋改吏部右佐。銓。或謂曷留意人才乎。曰。上有太宰。下有選郎。吾加一

言未必益於彼而見爲私故不敢有探太宰所向者曰  
太宰亦惟選司是依書考是視耳吾何知無何太宰誨  
貫外人謂吾聽於選司且吾欲用人而外輒預知者何  
也貫曰昔江陵時有缺十擬而十不符此以衆擬擬者  
更其法十擬而十符此以江陵擬今用人而因衆安得  
不預知凡選司所以敢行私者自堂官始堂官私一司  
官且私十堂官公司官毋敢不公則聽於選司乃至公  
也太宰喜未幾陞吏部左詞林佐銓未有逾一年者貫  
歷二年有奇曰此熱地可久居乎遂疏請覲親以馳驅

歸明年復起教習庶吉士再疏辭得請亡何而封公疏  
告卹典於闕下賜封公及太淑人祭葬加等服闋起直  
京禮部尚書馳疏辭不允尋改禮部尚書詹事府事又  
馳疏辭不允遂命以禮部尚書兼東閣太學士入閣辦  
事貫再馳疏辭不允遣行人敦促就道時倭寇入朝鮮  
天子出師討之而石司馬星議以王封倭中用事者平  
秀吉且陰許之貢貢途舊道於鄞貫習其害聞而歎曰  
是天下所安危也驅車而前先以書布當事者必毋許  
貢入朝又口陳之乃輒貢而第言封人閣未幾會甘廷

連捷加太子太保進武英殿大學士改戶部尚書給四  
代誥蔭子秘書加柱國勲三辭不允乃受戊戌主會試  
得顧起元等三百人多名士時朝鮮被倭未解也先是  
封倭兩歲而所遣臨淮侯夜逃歸以他使往倭報成而  
倭變上震怒下石星獄遣師征之貫上經理事宜謂  
宜用古屯田法爲久計又言宜徵舟師自登萊入朝鮮  
而開府於天津旅順間以總之然後舟師有統便上  
遽之會倭再入朝鮮我戍者楊元奔師走亡兩將朝鮮  
王奔經理都御史楊鎬單騎赴之止王勿奔呼其國人

爲守計我師進倭退鎬方銳治兵耻言持重肘腋倭將  
清正於蔚山不克捷始言屯初鎬爲新建令有異才故  
新建張公薦於朝墨衰爲經理而其去蔚山歸也遂以  
終喪請新建與貫皆以書勉使就功而蘭谿趙相公實  
左右石司馬始終言封不悞因圖去鎬鎬以新建及貫  
書示贊畫丁應泰丁乃極奏閣臣不宜與閫臣通而鎬  
失亡多皆當斬此時新建怨家又以他事激上怒  
上逐鎬連新建顧獨心諒貫所以溫諭之者良厚貫稱  
病篤不出蘭谿獨柄四閱月而痺閣中空無人上乃

強起貫乃出時遣給事徐觀瀾與應泰勘許世之亡失  
士忿欲變蘭谿猶伏枕奏東師數敗宜蚤撤在廷錯愕  
鮮言當戰者貫奉天子一意進剿議始定耶總督玠  
趣將軍劉綎等進兵於是倭爲我久屯食盡兵屢挫而  
平秀吉亦斃於國欲還我師遂指之與舟師陳璘夾擊  
斬石曼子搜餘黨在諸島者盡戢之朝鮮平捷聞上  
喜發帑寺十萬金犒犒而應泰復誣將帥用銀五千兩  
買倭去無寸功悉宜徹下獄貫聞上言國家困於倭七  
年治兵三年將士始奏功幾大賞班師歸國而故如應

秦言者則盡當誅。夫誅之與賞遠矣。無論他可否。卽此十萬人無望歸國。禍安底耶。且以全力爭朝鮮。而云五千金買之去。非理所宜有。於是天子憬悟。詔在廷議之。廷議者三。莫堅決。貫草制曰。罪宜從輕。功疑從重。其大賚將士。以倭平。詔天下而應。秦觀瀾因歸里。論功加少保。蔭子中書。貫辨曰。臣不任罪。亦不任功。惟置臣身於事外。可令將士之不盡酬者無怨言。而側目時人亦心屈也。竟無所受。然其時東事雖竟。上方與中尉拒析利事。章數上。多不省。於是閹權盡削。貫乃慷慨誦先



正鵠躬盡瘁之言。星出。星入。冀以觀效。回上意而所。裨益良多。王官請建黃天。蕩水寨。擅塩爲姦。貫奏致之。法楚瑄。亂徵陳奉。治罪而特遣大臣撫安之。遼東乘稅。使之虐。數易大帥。乃以故帥李寧遠往遼。始宴。然是時。海內所苦。惟稅關爲甚。乃梁永求爲秦鎮守。高淮求爲遼鎮守。李鳳求爲粵鎮守。貫皆百方沮之。且所在留重臣以制其橫。而羣閹始稍稍戢矣。己亥。播事起。播州土酋楊應龍。屢逆命。朝廷曲赦之。而應龍破飛練。屠綦江。愈狂逞。不可制。於是改四川。趙撫爲總督。兼制楚蜀黔。

以李化龍往。往則無一兵。獨特土司。以孤攻。更何裨。實與兵部尚書田樂議。徵天下兵。益以土兵。爲二十萬分。入道攻之。又以土司安氏與楊氏世姻相倚。使郭子章巡撫貴州。推心結納。諭以大義。使爲朝廷用。毋爲楊氏用。又以萬里請事。闕下往。及無及。嘗與田樂及戶部尚書楊俊民調兵食。預奏可行之。而川貴使來。適已行矣。遂無俱軍興。先是李總督亦以墨衰治事。逆龍就縱。而播平。始允守制。以巡撫郭子章代之。適有言安疆臣恃前功。冀後賞。不可無裁者。貫因奏當時定議。總督裁。

之以法。巡撫收之以恩。而使安民入掌中。子章方以恩收之。豈可遽裁之以法乎。裁則生怨。而開釁。使子章爲總督者。勢不行矣。上乃命王象乾總督。而子章仍爲巡撫。其後播界不明。總督欲用兵誅安氏。而子章難之。雖天救此水。西生靈。總督以憂去。卒安安氏。亦貫之注意。子章者。素也。亡何。茂林苗叛。復移師誅之。苗平。於是西南悉安矣。當是時。北虜款塞。入土谷雲中。無事。而西則松虜海虜。日跳梁於寧夏榆林甘肅洮岷之間。貫飭將士以備禦。而威虜以兵。仍與虜約一歲恭順。卽與

一歲市賞犯者必革由是北虜帖耳受約束而松山之  
侵疆亦復滇南暨廣東又時時奏功上屢以帷幄勛  
加重賚悉辭不受嘗曰吾居揆地曠職多矣懼罪之不  
任而敢自以爲功乎時國本未定廷臣歲有請上在  
歲有所施貫日從容爲上言露章至四十餘而賓榻  
無筭俄聞官中兩龍不相見見卽災以是爲諱乃言華  
封老人之祝堯欲多男子也我太祖有二十五子一  
百二十一孫而皇上未有一孫太是缺典聞官中有  
傳無端忌諱者不足信也太祖百二十一孫而身事

高壽未嘗疑子孫衆多以爲妨已也。於是忌諱之。婦婚  
成。又辨素問。壯婚之語。表長至。輝珥之符。引解縉。題虎  
之詞。舉七夕鵲橋之譬。遇物則諷。遇時則諷。不直觸龍  
愛子之喻。梁公姑姪之諍也。上卒感動。辛丑春移  
元子於迎禧宮。然甚歷寂。議者交欲姑順。上心之所  
欲。而先冠婚。緩冊立。臺省大集於貫所。貫言。先冠者。義  
冠。太子冠乎。諸王冠乎。婚。奚稱。妃。太子妃乎。諸王妃乎。  
婚於何所。官中乎。諸王邸乎。不正名而苟成事。明降  
元子爲諸王。不如仍稱長子。猶有望也。某則以爲微冠。

莫婚。徵冊立莫冠三事一事不可離拆必正太子名冠太子冠妃太子妃而後禮成婚不可後則起立矣官中幸未有離言者離言則吾將死爭之而忍導之乎自後貫戒羣臣無譁譁必不濟我則托股肱心膂之誼以吳諫無忌也是歲八月貫又引既醉斯千之詩以諷言元子聰睿之性強壯之年血氣既充天機默啓親父親子喘息相通不望之父而誰望者昔皇上之婚及時故毓皇子蚤然聖母已遣官四出致祈猶遲之也人情篤於愛子則必愛孫而愛曾孫也滋甚皇上爲

元子大禮計過用必欲具儀文備珍寶以厚之而推念  
真情不如早偕伉儷之爲建孝 皇上孝奉 聖母朝  
夕起居備物盡禮而推念真情不如早遂含飴之爲承  
惟於是始得旨已勅禮部擇十月十五日具儀行矣而  
十一日又以冊寶未備傳諭改日貫封璽 上諭極諫  
曰此 皇上最善慶事國家極重大典天地祖宗百神  
無不環拱以待寧獨萬方引領也而倏言改日則天下  
不謂所司不辨謂 皇上生他端衆口沸蜩甚於曠昔  
而人心解體矣臣萬死不敢奉詔復言冊寶卽未備可

以黃箋檄代也。俟他日補之未晚。於是上收改日之命而復急責大司農金錢貫隨方調護之。得勿罪。十五日卒冊立皇太子。并封諸王。禮成而冊寶亦既具矣。覃恩加太子太傅進建極殿給誥命。廢子尚寶司丞再辭不允。乃受。壬寅三月。上忽不豫。遽召貫入啓祥宮。暖閣。屬後事。貫受命出。謂諸監曰。主上神氣完。無慮。惟所諄諄命者。宜卽行之。俾天下歌聖德。祝萬壽。不可以失。今日於是就文書房立擬旨。進且附奏。總成之。而言臣。今夕直宿朝房以待。是夜得旨。盡召中使還罷。曠。



稅織造出繫囚原建言得罪者補科道官天下欣然若更生而詰朝輒反汗貫率諸大僚強諫終不聽惟閣僚已簡沈歸德朱山陰相次起而臺省悉新補天下恃根本定無大憂是歲秋以病求去者踵五上不許秦人御史劉九經論三大臣而繼以南山十月之語蓋借尹氏皇父以刺貫然其詞隱貫未之省也都御史三原溫純忽疏秦人不擠首相乃給事姚文蔚御史于永清搖唇鼓舌以惑首相俾不安於位乞逐之貫言臣以老病求去實未聞二臣言也而歸德擬旨出御史爲推官戒屬

給事

上從之純猶憾此兩人求去不已

上格其章

純意貫陰主之於是臺臣湯兆京康丕揚因起攻訐而南北之釁自此開矣癸卯楚事又起先是楚宗華起有怨於王訐王與弟宣化俱非恭王胤取他人子祿而育諸官者也以其妻王氏爲証事下部院禮部郭侍郎武昌人與王同城爲越左袒賈曰此事所不可行者三官關曖昧一年月久遠二事體重大三郭侍郎不聽而歸德復助之乃行撫按勘問勘至僅具兩造詞以聞不敢決也

上命九卿科道雜治之戶部尚書趙世卿暨詹

場尚書謝杰極言楚王非假。臺臺數千言。乃禮部上會議疏。止括諸大臣指。不以全卑進。又請令楚王釋國事。以他郡王攝之。蓋郭志也。給事楊應文。御史康丕揚疑郭有私。各以疏劾。郭上章自辯。語侵貫。貫避不敢入。上謂楚王真假何至三十年始發。而華越夫。訐妻証。不可信。令歸德擬旨。歸德擬令再勘。如部指。上命改票者三。終以不了之旨進。於是給事錢夢臯極言証郭波及歸德。歸德亦避不敢出。山陰擬旨。乃言楚王非假甚明。不必再勘。而楚事定矣。貫申前懇引去。上敦諭始

出而怨有集以其間作蜚語危東宮名曰續憂危疏  
議大略謂東宮之立非上意終必易之詞涉貫與  
山陰上聞震怒急購所爲妖書者并其黨立賞格逾  
軍功於是偵校四出多所捕逮時敝生光已下詔獄治  
而遊民沈令譽復執令譽者吳江人也提一藥囊編遊  
椎貴門行徑甚詭康御史跡捕之搜其裝得刑部郎于  
玉立吏部郎王士驥手書蓋玉立起官由士驥而郭待  
郎爲之地也又得楚王寶樹及華越副本於是人言籍  
籍并以妖書擬令譽而郭與于王皆危矣是時郭侍郎

以告歸。留楊村未行。令舉事發。乃遣人之京刺之。其人  
以暮入。以晨出。蒙首以幘。偵校疑而執之。亦下詔獄。灼  
議悠悠。有疑貫甘心於郭者。貫乃璵言此書之情。本爲  
傾臣等而發。非敢犯上。願緩之母。使羅織。臣等書生。豈  
以刑名爲政。若借此獄。以快私仇。與奸賊何異也。於是  
外議稍息。諸大臣以此獄不結。慮株連無已。時固坐獄。  
生光以死而獄悉解。乙巳。以考察自陳。不允。旣而有頌  
言。貫誼不復出會。皇長孫生。貫雖在告。猶勸。上肆  
大赦。上。聖母徽號如元子生例。時。聖母年正周甲。

而國曾孫之慶請之亦以重。儲宮定國鼎鼐時政收人心也。於是罷礦使減稅課之半以給將作而民始悅。自後遽稱疾篤辭俸給絕書札盡謝閣事其時玉牒告成河州獻捷竝有恩命皆不受而比黨益急擊貫貫疏凡八十上終不明傾害之由第言輔理無狀宜去病益甚宜去始得旨聽養病回籍遣行人護行賜銀幣有加禮。濱行復上疏謝因陳十事。一曰發章奏二曰補大僚三曰備言官四曰釋繫囚五曰重邊事六曰罷稅使七曰疏滯官八曰捐內帑九曰停殿工而終之以御經筵。

及。太子諸王講讀。且曰。臣荷高厚之恩。無能爲報。惟皇上採臣餘忠。見之行事。則紀綱復振。政事復舉。太平可立致。無難者。臣雖去國。猶賢於留。時年已七十老。而懸車。亦其所已。貫居閣十有二年。獨任者八年。其所處。乃在宮闈。艱旣之際。海宇疹瘥。之秋。勞心焦思。唇舌幾敝。家人見其眉。未嘗一日展也。而卒能定大計。靖大難。以無憂國家。金甌豈非忠誠所致然哉。以大度攝縉紳。以大德懷反側。以大道通天下。而密以正行。不言所利。救朝鮮。則云不利其一土一民。誅檣。則云朝廷以誅逆。

爲事不以闢土爲功勸立。東宮則云好事不可顯伙。不可直做。昔子房以四老人爲羽翼。吾用此法以天下爲羽翼。朋黨相攻無所袒。曰吾惟憂國奉公者拜手耳。何知同異。身不敢護是非。安能護人是非。身不敢管名級。安能管人名級。又曰吾生平不以舊知加新知。今日之新知卽他日之舊知也。不以私知加主上之知。孰非。主上賜而顧小恩。忘大恩。又曰吾不能傾心於百司而求上傾心於我。則不恕。又曰信而後諫。不諫何以著信。以故閣中疏揭前後至千餘章。或謂閣揭不宜。



太多，多則輕。曰：此有時焉。往時不得不少，今日不得不  
多。其後，晉江福清相繼入閣，視左史所記諸草，井井具  
劇，咸歎以爲不可及。云：旣歸，杜門却軌，絕口不譚時事。  
獨取所著易學一書，歲刪定之以課子弟。居家者九年，  
七十九歲卒。訃聞，上爲震悼，賜祭九壇，加四壇，遣主  
事顧起鳳管葬事。易名之典，閣中以文靖文恭請。所著  
陳善集六卷、敬事草十九卷、喙鳴文集二十一卷、詩十  
八卷、易學若干卷、老莊通若干卷、彙編史論若干卷。  
吏部尚書文華殿大學士朱少欽賡

朱賡字少欽山陰人父節泰州守母陸夫人將誕賡而  
病羸姑徐慮甚方默禱起視兩炬橫豆如梁各吐蓮瓣  
者七泰州公大喜已而賡生丰神秀挺六歲喪母哀毀  
如成人聞都講授人經義倚壁而聽竊了大旨卽私自  
結纘諸名士爭指目以爲奇十七爲諸生餽於庠嘉靖  
辛酉舉鄉試隆慶戊辰成進士由庶吉士授編修與修  
世廟實錄陞修撰復與修穆廟實錄陞侍讀充經筵  
講官神宗皇帝方冲齡酷嗜學每聆賡開陳輒和顏  
受之一日聞宮中娛情花石因講宋史花石綱極言羣

小乘勢騷奪害民甚大不可

上退戒左右曰講官有

可畏以講讀勞晉左春坊左庶子兼侍讀學士掌翰林

院事未幾陞禮部右侍郎直日講如故尋轉左會有奏

官之役命廣往定規制司禮密傳上意欲徵永陵

制者廣陰令人丈地廣狹疏曰永陵廣八十一丈外

加方牆若干今必欲如制洩地氣不小請並外方牆用

八十一符聖祖九九數且昭陵在望而制不等

非所安長洲色動曰上請旨昭陵奈何獨新安贊

云此正與獻陵對峙疏留中久之上密使人會其

施亡異竟得請人謂廢斯舉無論省金錢亡筭所全主  
德亦甚大改吏部左侍郎晉太子賓客陞禮部尚書兼  
翰林院學士入言閣臣曰時方春和計吏在庭某當以  
建儲力請不得如九卿如臺省以次進政府從中力贊  
其必有濟疏上會南都有請者訛言上引燭焚貳舉  
莫敢應廢再疏不報是日有旨選中官二千名廢顯言  
其害得減半俄奔繼母葉夫人喪歸尋故讀書東武山  
處建逍遙樓偃卧其中十有三年上念舊學以尚書  
兼東閣學士入閣辦事遣行人勅駕再辭不允至則肅

陳礦稅爲害。至引唐玄宗宋徽宗爲戒。詞甚切。上優  
詔褒美。時四明在告。有以蜚語中歸德於四明者。大中  
丞溫純疏言。科臣姚文蔚道臣于永清爲間。請黜此二  
人以正國體。四明請去益力。而大中丞持前議力爭之。  
上以示賡。賡奏曰。元輔一貫都御史純皆大臣。一有軒  
輊。令兩臣俱不安。上兩留之。遂下中丞所糾臺省疏  
屬閣。適歸德入視事。議曰。謫臺臣全總憲體足矣。賡整  
其議。上從之。明年楚事起。四明方與江夏郭宗伯見  
互异。未定。而又有訛言事。謂上召拜賡。意托賡名。微

示指株累多人

上震怒甚遣中使慰勞廢爲伏地哭

失聲

上忿姦未得偵校四出時皦生光已下詔獄治

已忽捕醫士沈令譽得王銓部士騏于比部玉立夙與

勞問書欲以姦書事坐令譽波及于王廢擬姦書付法

司而以于王下部院

上意不解促廢擬嚴責廢第從

姦書事改擬稍有加而于王事無涉竟從前擬廢曰太

獄將典可奈何乃移書四明言甚具四明始從科道廷

鞫論磔皦生光事罷九月疏請釋逮繫華司理珏等十

餘人於詔獄以考滿加太子太保文淵閣大學士廢一

子中書舍人十一月工部據例請殿門工。賡謂此嘉靖  
三殿故牒及十年兩官成規。今軍興旱潦所在若洗而  
所入礦稅原爲大工計者。不得名一錢不此之請。謾援  
往牒使。皇上無以示信天下。非所以光聖德。乃具  
密揭進。上覽之大悅。遂傳旨緩工。復令擬論進。賡因  
備陳礦稅原爲大工信不可失。乃下諭封礦所在稅課。  
改有司徵以其半。濟工。蓋三日間。上爲賡轉圜如此。  
詔下。海內歌舞更生矣。是日以洵州加恩。三疏辭。乙巳  
大計。臺省被察者。皆留南察。疏至。賡恐旨從中出不及。

許具揭言不可狀。上已下南察疏傳諭臺省人少宜  
留用。賡極言壞。祖制滋煩。議臣死不敢奉詔封原疏。  
還。上竟從賡議不復留已。又揭南察既幸改正南北  
一體且制也。聽之去便。上復從賡請。於是諸臺省被  
察竟無敢留者。衆譁始息。無何而稅監梁永誣咸陽令  
宋時際。咸寧令滿朝薦唆切稅銀有旨逮時際。降朝薦  
一級。賡揭言永單詞未可盡信。且調停詔旨。方新復逮  
有司。非所以一觀聽。於是時際免逮。朝薦得不失官。七  
月四明罷歸。歸德亦奉旨去。賡以一人獨理閣務。首請



釋御史曹學程罪御史以語東事忤旨繫請室五年至是始釋天下翕然歸賡而御史亦謂賡實生我丁未當大計以久瘁杜門固請簡用閣臣不報三月以甘鎮捷加恩不拜復以病請會長子敬循計至哭之慟再疏請簡閣僚代垂死老臣上惻然動念從廷推拜東阿福清晉江入內閣起太倉於家廼廷推之前上嘗有恭默正思枚卜得人之旨賡心慮旨從中出疏請付廷推廷推者五人而晉江爲衆論不滿已得旨遂被言而漸波及賡有衣鉢之疑矣賡久卧病以晉江福清初入閣

勉起同事先已定選館之條著爲令及是止黔蜀用兵  
所全活生靈無量以一品滿進少保兼太子太保改吏  
部尚書文華殿大學士廕一子中書舍人會諸臺省奏  
發四明楚事及蠶歸德併謂時三四言事者去國廣似  
有意督過之爲四明修郢言益紛紛大半謂廣一去足  
以明志而廣實病甚惟顧天自白而已亡何病卒先是  
欲悉數時政叩闕而請及病篤乃括其言以當尸諫  
上優詔報可廣及彌留猶張目問曰上意云何顧面  
謝者再計聞震悼賻卹備摯贈太保謚文懿明例閣臣

不叙邊功。然陽繆舜而卒拜者。實繁與同。功不同。罪相蒙。以誤疆事者。往往而是。賡自柄國來。甘肅加恩。舜皮林加恩。舜河州加恩。則又舜其識過人遠矣。舜人慕。棘有告以援者。輒曰。不得之。上自賡在事。出華司理。又出曹侍御者數十人。使主上好生之德。洽於民心。海內苦礦稅如坐水火。賡在事。封礦井稅。付有司去其害。過半。黔蜀交攻。迄無已時。賡疏請寢兵。使兩國不受鋒鏑。入官數十年所入俸。多以周諸族子。蕭然如寒素。若賡自謂可庶幾無憾矣。天下所不慊志於賡者。有謂遣

佚在野。未覩連茹。有謂。天聽日遠。未見轉國。有謂。四  
明舊轍跡。涉回互。嗟乎。爲相難。以紹興繼寧波。尤難。不  
嘗讀廣之茶史乎。食茶者。以苦語人。不知惟食者知之。  
問以苦何如。竟不能吐一語。然則廣之心苦矣。知其苦  
者。誰臨文撫卷。不能不爲之三歎。

兩浙名賢錄卷之十四終